

乾隆汾州府志

汾州府志卷之十六

人物四

張登楷，孝義縣人。家故貧，父問智客遊十數載，無音耗。登楷稍長，自力成家。既有子矣，一日訣家之人曰：我將尋吾父所在，不見父，終不歸故里。輾轉經年，至川西，乃得遇其父。問智見子，雖喜不勝。然在彼地，更娶妻，生有一子。因是謂登楷曰：我家無立錐地，汝力薄難支，俟有餘蓄，可復圖團聚。登楷度不能強，乃返貸於族鄰，盛飾輿馬，往竟迎父以歸。已所置產，均分與弟。其居鄉多善行，鄉人稱之曰張孝子也。

劉昇祚汾陽人順治初以進士官湖南道駐辰州賊來攻城昇祚設守禦甚備出奇兵擊之賊遁走已而賊大至衆數萬圍辰州昇祚擐甲登陴立矢石間指麾捍禦而辰州爲鎮黔咽喉故賊攻之急數月城陷昇祚猶大呼巷戰死事聞贈光祿寺卿廕一子入監僕溫虎亦從昇祚歿於戰

任長慶字雲石石樓縣人順治二年以拔貢生授中書歷工部郎中出知淮安府轉鳳陽道改臨洮道卒於官長慶精心計有膽畧任中書當從駕人皆憚之長慶毅然請行姜瓖之亂大兵來討復請從行恢復多有贊畫

在工部權燕湖龍江稅以廉潔稱所著有易解  
趙永祚汾陽縣人順治丙戌進士授雷州府推官性剛  
決執法不阿時雷民多匿山谷學校之教不興永祚得  
通文義者二百人附於學親爲督課雷人始知讀書值  
盜王翰肆焚掠永祚與同知周燦詣其巢開誠撫諭翰  
投戈尋補慶陽府推官亦以清敏著卒後囊囊蕭然人  
咸稱爲廉吏

王廷伊字嚴介介休縣人以舉人順治中知信陽州憂  
歸起服知商州招撫流亡甚著治績內遷兵部職方員  
外轉車駕司郎中典己酉廣西試遷瓊州道汰巡查檳

榔規例瓊海稱之以繼母憂歸卒。

師佐字靖公永寧州人順治壬辰進士知福寧州招流亡嚴差役爲文以驅虎患民立祠祀之遷蘇州府督糧同知釐漕盡滌除漕規與糧戶約曰爾曹省一釐旁費則完一釐正供督撫兩疏薦會病卒。

于清端成龍字北溟永寧州人順治十三年以副貢知羅城縣縣數遭兵燹後拊循殘氓稍稍相習因問地方利害悉得要領編置保甲定約束前時鄰徭歲率二三至殺掠人畜成龍勒鄉勇將搗其巢咸懼自投不敢犯界上躡所虜掠然後民得事耕稼縣有數大姓恃徭獍

盜賊爲爪牙。一逆其心，則召亂。成龍善撫民，恩威並用。數大姓皆奉法，惟謹。居七年，遷知合州。往者新歸，流戶墾田既熟，土著輒爭之。故旣集，復散。成龍爲規畫，立案籍。三年而後，稱旬月間，報歸千戶。未幾，遷黃州同知。駐岐亭。岐亭當黃麻偏界，多汙湖幽壑，盜所巢窟。時急盜案，官以盜爲諱，白晝行劫，不問。成龍遣捕得九人，集諸父老曰：「能保後不爲盜者，賞之。」保二人，卽諸父老前，取大索連繫七賊坑之。盜自是慄遁。又獲大盜彭伯鈴，拔置左右，責以捕盜。巡撫張朝珍器重成龍，舉卓異。會吳三桂亂作，檄攝武昌事。問禦亂策，成龍對以安人心，莫

先下令停徵。朝珍已草疏，而成龍意與之合，以故兵事皆屬成龍。諜指武昌大姓與賊交通，以藏器仗爲證。成龍言大姓多避兵，良子湖中，家人藏兵械，備他盜，無足怪跡之。果無所得，用卓異遷知建寧府。朝珍奏改武昌檄造軍所渡橋於蒲圻，賊鋒迫入城守，而橋以山水暴漲圯，罷職。會東山寇作，朝珍復委除賊。成龍曰：黃州界三省，控七十二寨，其人剽悍阻險，難猝勝，請得便宜行事。許之。問需兵幾，何。成龍曰：前守蒲圻數人，與俱足矣。先是妖人黃金龍亡匿劉君孚家，君孚得吳三桂劄書，與金龍潛結賊渠周鐵爪等，期七月並起。會麻城人欲

因以陷其讐家事洩君孚恐遂以五月反於曹家河成龍行次陽邏偵知君孚雖反衆未合遂趨白果未至賊寨十里止宿榜示脅從者許自首免罪誣陷者赴訴不按捕投訴日千人皆宥之賊勢孤欲卽降恐見誅成龍知其情遣一人持檄往諭而自騎一騾一人張蓋一人鳴鑼前導未至二里許命行呼太守來救爾山中人君孚匿後山夾道伏鳥鎗弩數百人成龍鞭騾直前入抵賊舍坐廳中賊環列黥者因相率羅拜成龍問老奴安在君孚嘗隸岐亭役故呼以暱易之又問山中雨水禾稼遂曰汝等皆良民何作賊自取屠戮父母妻子藏匿



賊皆泣成龍曰熱甚須少憩遂熟睡移時寤曰客至何  
乃不設酒脯君孚初懼見給及是出叩頭自訴許招撫  
而還如期盡降其衆數千人以功復官留麻城經畫行  
村野分立區保擇謹厚者爲區長還武昌聞金龍逃合  
紙棚河賊鄒君申則移檄區長徵得二千人進駐望花  
山度賊食少彼利速戰緩以困之必自潰分三路守象  
棋山大崎山及布袋坳以賊走必經黃岡伏兵馬鞍山  
嶮巖間君申金龍糧絕夜遁走遇伏盡擒成龍坐山上  
受俘疏聞晉級改知黃州府江西賊犯湖口旁掠興寧  
吳三桂密布劄書陽邏陳鼎業合逃兵掠驛馬永寧鄉

何士榮石波劉啟業白水阪周鐵爪鮑世庸各擁衆數千爲亂逼趨黃州是時各鎮援兵悉隨大軍進攻湖南議者欲退保麻城成龍曰黃州爲湖北七郡門戶我師屯荆岳者數十萬水陸轉運取道於此且瀕江控制險阻前倚興寧廬阜後壓天堂金剛諸寨雖祇一郡定東西關鍵不可棄之去然徒坐困莫若相機進勦賊雖衆皆取士榮進止先破士榮餘可不戰而下於是徵集各區鄉勇有衆二千人別遣黃岡縣知縣李經政擒鼎業謀報士榮已據黃土坳分衆以把總羅登雲武舉張尙聖領之往遇賊前鋒戰少利成龍疾馳抵尙聖營鄉勇

大集共得五千人營箔金寨下與賊對壘士榮數萬人  
自牧馬崖分東西兩路來攻東路賊少以登雲領千人  
禦之而成龍率千總李茂昇當其西尙聖攻右把總吳  
之蘭攻左戰始合之蘭中鎗死賊鬪益急成龍鞭馬徑  
前廻顧茂昇曰我死可歸報張公茂昇奮而進發矢折  
賊大旗軍隨進茂并馬被鎗棄馬射殺二人換馬進戰  
復手刃數人而尙聖自右山繞出賊後相與合擊賊大  
敗士榮左臂斷就擒得賊名籍焚之登雲擊東路亦追  
奔數十里乘勝至呂王城據鞍草檄馳諭賊聞士榮被  
擒又知毀其名籍各解散至白水販鐵爪世庸等欲保

什子寨成龍已先令人守隘不得上脫身走追擒之又分衆平石陂賊自進勦至此纔二十有四日東山亂定此康熙十三年冬也十五年水旱洊臻訛言復起成龍以人心易搖宜示以暇豫乃治赤壁亭榭與文武官寮飲射歌詠其間而密得暗奸流彘頓息歷官江防道福建按察布政使直隸巡撫江南江西總督卒年六十有八贈太子太保謚清端廕一子入太學其遷按察使也時取精忠初平羅重辟者衆獄已具成龍力言通海數案所牽引半皆平民遂白於親王釋不問成龍清嚴忠直勤勞治事官吏無不敬畏歸於廉慎及卒將軍都統

沙月三  
卷一  
六

察屬來至寢室見周身布被一笥中袍一襲靴帶二事  
堂後米暨鹽豉數盎而已平時心憚成龍者俱感動流  
涕士民立祠於清涼山

曹席珍臨縣人順治戊子舉於鄉康熙二年知竹谿縣  
自張獻忠平毀城池後垂二十九年皆其餘黨盤踞三  
省會勦始經收復然文武官之蒞竹谿者猶各居山寨  
席珍請於上官徙入縣治事總督張長庚可其議於是  
兵民中分縣治而居經營招徠以縣無城池建臺設炮  
石弓矢以備不虞居十一年遷知彝陵州未赴任而吳  
三桂反湖南諸郡同日告陷鄂襄所屬沿漢江上下千

二百餘里。鎮協偏裨及士卒聞風並起。襄鎮則楊來嘉  
郎協則洪福。竹山則謝泗。竹谿則馮元。各思投賊。甲寅  
三月二十五日。馮元邀席珍飲。未數巡。脫巾投地曰。時  
事可知矣。我輩宜乘機會。席珍正色曰。我輩當奉義守  
死。與此土存亡耳。明日。元遣人詐謂同心守死。當赴神  
盟誓。席珍知其謀。據臺不出。四月七日。元令家屬處南  
山漫陰寨下。爲入川計。乃率衆攻臺。三日。凡五戰。元取  
薪集臺下。欲焚臺。會秦兵至。駐劄白土關。距縣四十里。  
元顧瞻首尾。而守備劉斌所轄士卒三百餘人。不願入  
川。中途劫斌還。元勢窘。遂舍去。八月十九日。賊將洪福

率五鎮十三協來攻欲取道竹谿窺興元及關南秦隴  
席珍率衆據中峯觀扼賊要路令劉斌分據桐溪寨爲  
犄角賊分兵攻擊歷四旬大小五十五戰賊以餉匱萃  
其衆攻中峯席珍竭力捍禦弟曹傑從子曹啟東及家  
僮張永祚楊真寨民陳泰孔木匠從役徐祿何天祚等  
皆力戰死賊將馬更奇將登觀席珍手發大石擊之中  
腦立斃羣賊束草竿頭以焚觀樓樓上火起閹門遭屠  
戮婦女二十餘人相攜投崖死席珍復上中峯絕頂靈  
官廟據險以禦不食已二日又十餘戰家僮四十餘人  
盡見殺力盡被執旣而得脫走白土關投遊擊余位都

時位都已暗與賊通執席珍予賊洪福送房陵行至竹  
山上庸驛題絕命辭於古廟壁其辭曰昆明池水橫六  
詔中有長鯨尾不掉西南風鶴過湖湘妖氛一夜滿邊  
徼我家山右尹楚水十載楓林始量徙全荆門戶屬西  
陵未及交代軍聲起康竹綿亘到襄樊長漢一千二百  
里偏裨鎮師與三軍盡是八閩謫戍子潮聲夜半捲鄖  
關鳥語狐鳴滿漢南高官大爵爭來啗不信常山人姓  
顏水冷金寒性所成誓將隻手荅聖明內外援絕四十  
日嗟兮帳外皆楚聲闔門義士同日死血頸模糊當路  
橫牀頭刀頭總氣盡刻木束蒲莫問姓任爾碎首與流



腸羞向竈養，句餘命朔風冽冽。雪花急關木，嬰鐵解房  
國讀書萬卷，取義難悠悠。生死何足說，系命飛報武陵  
路。幽繫房獄無朝暮，夢魂夜到睢陽臺。傷心誰復辭霧  
露，臘盡冬回春到頭。令下還官許釋俘，共說反命偷生  
好。讀史會笑滿，武秋月黑冒險度秦關。襍鹿初奔說萬  
難，堪恨余逆通線索。反命成仇縛送還，重羅羅網再榜  
掠。血肉風飛俱見骨，半口鐵鈕斧合親。右手筋斷右骨  
折，風吹枷鎖兩做囚。猙獰鬼卒互輪流，上庸城外南江  
水。欲葬魚腹不可求，寒熒叫滅照破肉。啾啾如聞夜鬼  
哭，雙眸開闔不能言。潛將甲子算太乙，兩葉天子日正

中四海何地不呼嵩。但能厲得驚霄志，不怕虫尤十丈身。及至房陵將殺之，至期傳釋放。安置撒海堰，席珍採食荳花水芹等物，尋賣卜於市。至戊午，大軍進剿賊，夜遁。席珍首謁軍門，乃資送至鄖陽。總督蔡毓榮檄府道詳驗傷痕，適總督赴洞庭剿賊，停止上下文移。席珍僑居樊城，辭歸籍。後三院會題部議起職，席珍以年逾七十，遂不赴召。

高首標，永寧州人。順治己亥進士，知廣昌縣。母憂起服，補陵水縣。丁父憂，服闋補廣昌。時閩籓爲亂，未平。其將劉汝桂猖獗，首標單騎詣其營，曉以大義。汝桂心折，解

甲歸降廣昌旁州縣胥復準軍功例加五級尋以廉能  
行取吏部文選司主事疾卒於道旅櫬蕭然不能還會  
鄉人于成龍總制兩江乃獲歸葬。

董奕先介休縣人順治己亥進士爲平陽府教授遷國  
子監學正研先儒書以持敬爲本雜採鷲湖鹿洞條規  
分十則用訓多士所著書曰主敬編子振祖由拔貢生  
爲太谷縣教諭擢知霍山縣蒞任六載有惠政行取授  
工部屯田司主事卒於官。

梁纘素永寧州人以歲貢生知齊河縣齊河歲饑發倉  
粟哺之男女老幼用旗標識俾以次就食因爲澹趙牛

河築王龍隄民德之改知文安文安北接西淀爲水澤之匯造水車數百具挹田中水外出種秔稻得米數萬斛又條上制府酌定旗丁圈地租法不得意爲予奪由是五府胥視文安例卒於官祀文安名宦

梁潢字天水平遙縣人順治丁酉舉人知臨潁縣有善政行取主事歷員外郎中出知順慶府潢爲人精敏好讀書

賈達汾陽縣人康熙戊午舉人官沁州學正自少有孝行

靳士龍介休縣人父世愛與里人高汝才入山樵牧以

小忿爲才所毆墜崖死妻任氏方娠冀生男隱忍未發已而士龍生及長爲言父死狀而泣士龍嚙指誓必報父讐以母在遲之康熙三十一年母歿殮葬畢乃曰復父讐遂母志此其時矣因持挺出要汝才於路擊殺之語人曰四十年積恨今日始洩遂請縣自首或欲以其事始末白於官士龍曰死吾願也何喋喋爲卒死於獄縣人哀而葬之以節貞孝烈表其墓

周琦孝義縣人康熙癸酉舉人有孝行及銓知縣以父老艱於迎養改授教職

梁通洛介休縣人康熙庚辰進士知濟縣作耆狀勒之

石以時自警多善政解任後瀆人爲立生祠

李棠蔭臨縣人康熙壬辰進士授內閣中書以父病歸養服闋改知清豐縣以廉明稱

崔鶴齡臨縣人康熙壬辰進士知興寧縣有廉操縣境峒徭雜處山谷間宵小易於遁跡鶴齡察知民利病編保甲定約束使不相擾病卒於官輓不能歸士民感泣醢金爲助乃得返葬

劉而位字爾爵汾陽縣人康熙癸巳舉人知安陽縣至則訪民間疾苦有不便於民者務爲滌除凡訟案不使一夕稽留五年擢泉州府未幾簡授分守巡海興泉永

兵備道以足疾歸起歷四川清軍驛傳鹽茶道分巡松茂兵備道川南永寧道疾復作卒於官其至泉州也屬縣某貪婪不職有叔父在朝爲貴官劾之無所畏避及病家居講學十載每揭孟子是非之心大學毋自欺爲言故在蜀時制府尹公以理學經濟體用兼優稱之所著書有省克引一卷家訓數十則及社學鄉約條規爲學之槩得於理趣者雖淺深但如所見要歸於躬行爲本

高能宣臨縣人康熙丁酉舉人知平江縣廉介善撫字平江疲於輸糧積欠至十餘年能宣抵任悉釋其拘繫

鼓舞勸導風道一清士民頌之膺卓薦擢刑部安徽司  
王事母憂廬墓二載病篤親友勸之還家閱月卒

賀凝祚永寧州貢生官樂平縣訓導事親以孝聞祀忠  
孝祠

安之瑄平遙縣諸生有孝行雍正十二年舉孝廉縣人  
以之官及辭不應其善行多爲里黨所稱

穆生輝臨縣人由行伍官陞襄總鎮都督同知西山寇  
亂殉難廕其子授臨洮同知

梁榎永寧州人順治戊子舉人知新寧縣前此盜林亞  
祐等盤踞百峰山官兵擒斬及榎到縣上官令將亞祐



五人斃諸獄。榘研察乃林亞友，開平人也。友祐聲相邇，防兵誤獲成獄，爲申辨，往復十有七次，乃得釋。有海島五屬縣境，值查闢田陞科，榘因民貧，僅報六百畝。巡撫怒，榘曰：「不敢圖一己之功名，貽萬年之大害。」巡撫稱善。又值取楠木，鄰縣以五株費至白金六萬，榘念民貧，不能堪，卒請獲免。

馬得正，介休縣人，以供事與纂修議敘，判彞陵州。時吳三桂爲亂，州當其衝，軍需旁午，悉委籌辦。復隨軍進剿，凱旋，擢知銅陵縣。縣濱江，爲築大隄，數百丈，建石牓司，啟閉善，斷獄，民服其平。允憂歸，起服補魚臺縣，亦小國。

也。乃浚河百餘里。以平水患。後擢知桂陽州。未赴。致仕。歸魚臺。祀入名宦。

張苞。介休縣人。甫二歲。父遠出。無音耗。及長。尋至江浙。得父柩。以歸。事母以孝稱。母喪。哀毀骨立。築室墓傍。每食必奠。人咸稱之。

李克溫。平遙縣人。事父母曲盡孝行。卒後數十年。鄉人言子孝。必稱克溫。

梁禹甸。字奕奕。平遙縣人。以拔貢生知長安縣。擢知河州。俱有仁廉稱。能自持。不事逢迎。

王元勳。臨縣人。康熙庚子鄉舉第一。後揀發廣東。權知

清饒平二縣皆有政聲。又權判潮州府。卒於官。

王祚興，永寧州人。康熙丁未進士。知三水縣。時遭兵燹之後，地荒民逃，數歲無徵，虧錢糧正供。民因此益流亡，不返。祚興到縣，力請蠲豁荒地逃丁，屢觸上官怒。終得請，每歲得免地丁正額銀三千七百有奇，而民困始漸蘇。累擢至湖廣提學僉事。士服其公明，多立石紀績。

呂文櫻，字果初，汾陽縣人。康熙丙戌進士。知弋陽縣。又權知金谿。行取監督大西倉，以高安朱相國薦。授戶部浙江司員外郎，轉禮部儀制司郎中。服闋授湖廣道監察御史。尋擢通政司右叅議。收授奉天府府丞，以老告。

歸方任弋陽時甲與乙爭婚甲貧既聘婦而乙寔先貧後富婦家再受聘妄稱乙先出其聘物爲證察之辨屬新造詰乙曰若故貧安得有此詭稱三年前某舖造也呼造者對簿纔及一月耳女遂歸甲有以田質於人代書質契者已死受田之家毀質契更爲賣契賂代書者之子証之聽治時謂曰若父書生亦爲人作此邪曰有之如某氏某田某氏某屋皆出父手因曰爾宜和其事次日具覆不能和狀而其父所書二契已取至真僞判然乃予杖而許質者贖還既署金谿有鄔某死於途身負挺痕莫可跡見鄔妻呈詞有讐殺字密訊之則云夫

出不攜一物非盜殺故疑爲讐問其讐不敢言因屏左右導之言始述族有名歇雲者嘗以訟啣報疑其所爲而無據察情辭非妄逮歇雲至堅不吐既而授意一隸俾伏聽而遣卒佯報歇雲已成招今解府速辨行費母與妻俱哭卒卽去姑怨婦不阻其所爲婦以所持械在姑室中不知何時竊去伏者呼曰姑媳已承矣拘至案歇雲服罪其判事務研審類如此時縣於上官有積習未除文櫻羞逢迎矜名節適巡撫廉知文櫻爲吏良首列薦章格於俸淺未合例及入爲大司馬復以才守力薦故文櫻得列行取子審韶字學三乾隆甲戌進士亦

有學行鄉人多德之文櫻第四弟日文樞字用晦康熙  
庚子舉人舉孝廉方正又舉端人正士皆不就呂肯堂  
字子建汾陽縣諸生性梗直舉優行貢入成均而文樞  
亦官國子監助教與肯堂同姓不宗素相善既而文樞  
逮獄對簿時問者曰此有呂肯堂造言耳意欲以肯堂  
脫文樞文樞直應曰忌者欲擠我何可旁及蓋前一夕  
已有人導意文樞荅言吾豈嫁禍於正人哉文樞之子  
審廉在家聞父逮獄六日走千三百餘里奔至京師晝  
夜徬徨兩閱月竟感疾口中連呼辨寃而絕不瞑是時  
事已得解文樞哭慰之曰我事已白汝何牽於心而不

賈和語畢卽賈審廉字元清雍正乙酉舉人海寧陳相  
國悲其志作呂孝子傳其後文樞歸肯堂無所合亦歸  
家居講學弟子甚衆肯堂教人必先端品行然絕口不  
臧否人物能詩別無著述而後學言人品學問咸推服  
之文樞著春秋正宗十二卷及集古今人物曰正氣錄  
劉廷翰字子藩永寧州人祖爾勳歲貢生當明之季負  
母避亂猝遇賊以身衛母中流矢抱持不釋旣而創合  
母子無恙性仁孝濟人惟恐不及廷翰康熙辛丑進士  
知政和縣蒞任前二日次浦城聞尉張鋪墊舊皆胥吏  
預備而胥吏徵之里甲爲陋規遽禁止之居四年實政

愛民以賢能調福安代者至盤倉穀陰令碾者碎其米  
曰穀濕計每石折閱幾二斗廷翰不與校然缺額盈千  
矣建寧府知府疑之親臨核實則縣民環呼願求留任  
太守顧謂代者曰疇不畏新官嗔者而戀戀舊官乃若  
是因命取穀監碾則每石得米五斗外且浮二三升代  
者雖語塞猶以其厥色惡爲辭時衆民聚觀爭歸輦負  
以易頃刻間脫然免於累念年逾六十力請致仕未一  
年卒於家

賀方泰臨縣人雍正丁未進士知永寧縣治務寬厚改  
代州學正方泰四歲喪母撫於祖母馬氏性孝爲童子



誦詩讀書每觸念泣下。

劉元錫字服章永寧州人雍正丁未進士知臨邑縣歷  
壽張文登遷知德州擢知青州府改濟南病解任尋起  
權知沂州府海寧陳相國知其賢薦臺諫之職會疾作  
卒於官元錫明吏治所至有聲壽張東距會河三十  
里而近古濟汶之會由縣境以入海而宋熙寧中黃河  
決澶州趨壽張之張澤濼明正統中決新鄉漫曹濮潰  
壽張沙灣故縣境多瀉鹵洿澤民恒苦澇治之南沙嶺  
小龍灣等七窪其下雖舊有河形歲久湮塞計民田五  
萬七千五百餘畝遇久雨輒沒水中元錫相度地勢闢

溝分洩導沙嶺窪之水由黃家岡出小龍灣等窪之水由五汊口出各設牐扼其衝前此蒞壽張者或議疏濬卒恐有妨運道因循未敢興事至是而數萬畝民田無憂於淹浸文登濱海隅俗輕生婦人尤其一歲中自戕者至百數十人元錫爲勸戒語俾鄉之老成人集男婦徧爲講說自後輕生之案遂終歲無聞及爲府時以歷官二十載所躬自體驗者十有五事成書一帙曰切戒欺飾曰隨事教化曰獎勵善良曰矜恤窮民曰禁借命誣告曰清釐保甲曰設立義學曰戒民輕生曰速審詞訟曰禁飭胥役曰詳慎初報曰矜恤獄囚曰量捐積穀

日嚴緝盜賊曰整緝橋道渡船語皆樸質以告所屬州  
縣其書題曰商言謙辭也論禁借命誣告有云鬪毆殺  
傷難保必無徃徃有將平日睚眦之怨羅織詞內問官  
以事關人命不得不行拘訊到案不承嚴刑備至每多  
誣服以致沉寃莫訴卽問官明白查訊得實而初詞有  
名輾轉地累動輒經年幸留殘喘業已家傾產蕩嗣後  
如有誣捏按律反坐不宜以事出有因等語代爲開脫  
仍先將執法本意逐細示諭俾知警惕論速審詞訟有  
云如婚姻地土始必批查覆未清晰至再至三民間已  
多涉及經準理差役傳喚不定帶到確限該役每多

需索壓捺，稟到之後，問官又多停擱，甫經懸牌示審，臨時或有事故，不得不行改期，既審未結，又復另期收審，笑笑小民，何堪輾轉守候。余歷任以來，票內俱令注明離城里數，三十里限二日，五十里限三日，遞遠遞加，另備手摺，將簽票事由期限逐條登記，置之案頭，到即審理，十數年間，並不懸牌示審。如有壓捺展摺，即知期限有常，審理無滯。該差鬼蜮難施，論禁飭胥役有云：若輩外似謹愿，內多奸詐，誤信其貌，任用不疑，或與家人勾結，內外串通，竊權恣肆，作奸犯科，無所不至。惟在吾輩居心清肅，不爲所中，事由內定，毋使置喙，論詳慎初報。

有云人犯初到真情難掩得情一易問官每易視之命案傷械不符盜案贖夥未確之類無心細詰迨至審解供情互異初報不能更動輾轉籌畫移情就事業已大費周章或事相逕庭罪關生死何忍置生於死應死而生難爲辨白上司以事關出入不得不行駁詰再四頂詳始得定案問官以生死各當心輪得釋嗟此無辜業已備受刑楚案內無干亦受無窮拖累此皆初報不慎之故以上四事議論切深可列爲治法故刪取著於篇若其首之以戒欺飾尤接乎上下之本元錫在文登常以事傳保正某後期詰之惟俯首請罪怪其色沮問旁

役則曰其家有妖魅少違禍且立至彼若言此又涉妄誕故不敢言元錫命其人以狀訴歸未具狀妖遂絕

呂曰唯汾陽縣人家貧旨旨不闕於供一事養之常咸出於至性鄉里目之曰孝子其祖母年七十有二感傷寒症不汗醫已無策曰唯禱於神卽自卧祖母被中未幾曰唯徧體皆汗祖母遂亦汗而愈曰唯以訓童子爲業而由家庭戚屬以及村黨疾苦困厄必身任之雖貧竭財力以行所當爲年四十三而卒衆論惜之

丁歲春孝義縣廩生事繼母以孝稱家貧勤學雍正五年學使按臨日命新進生童卽學使公堂再拜歲春爲

師生平讀書務體要嘗曰讀大學當於知意心身體認  
明德讀中庸當於喜怒哀樂體認中和方見聖賢語言  
於人無隔礙所論著有四書撮要周禮正編內則烈女  
傳四言訓詞等書子運升乾隆丁卯舉人

霍愚孝義縣人天性過人父母歿居喪盡禮三年之內  
每食必號泣以祭友人趙念祖將遊京師無擔石之儲  
猝舉家托愚歲餘歸妻子衣食贍足出其望外晚年家  
業已耗猶屢爲族人之貧者輸納官糧雍正八年衆議  
舉愚孝廉却不受愚美丰姿少時有豔婦誘挑之愚謹  
避有知者重其持正

賈權字爾衡汾陽縣諸生雍正中舉知宣城縣又權知  
寧國縣舊例漕米折色徵收糴於蕪湖關議價必贏餘  
目爲出洗權爲滌弊僅符時價正數民歌頌之其在宣  
城也始至卽滌免帶征解費銀三千諸陋規汰免一清  
尤善決疑案廉能之聲數月間卽噪遠邇涇縣民爭戶  
口及是百年矣至擊登聞鼓事下卷牘山積援引百餘  
人巡撫曰此非賈宣城不辦卽以委權察得其情實遂  
一言而決會行取擢主事權念父母老又無他兄弟遂  
告歸宣城故有祠祀謝元暉李太白名二賢祠民相與  
增之曰三賢肖像其中復建專祠於敬亭山



張士俊介休縣人。由行伍起，授保定營守備，擢遊擊。旋轉淮安漕標叅將，理漕務。淮安城低下，臺堞與漕渠綠隄齊平。雍正八年，水漲不踰隄者寸許。士俊曰：「惜小費貽大害，非計也。」隄西洪澤湖汪洋萬頃，決隄使水入湖，及勢殺而後議補苴於城漕兩利。當是時，淮民賴之，越數歲，授四川重慶總兵官，設救生船以濟瞿塘行楫。復調雲南，歷永順、昭通兩鎮。乾隆九年，以老乞休，邀恩加銜，予蔭。

梁眉，孝義縣人。父可傳，樂施與，時出錢粟周里中貧乏。其死亡者，助之棺衾。眉有孝行，值兵荒，負母潛逃山谷。

母李樞在殯頃刻不離苦次。知縣陳之文額表可傳。曰義士表眉曰孝子。眉子佩亦端方恪謹。知縣閔衍額表之曰德行。可傳。眉佩並諸生。

李昱寧鄉縣貢生。有孝行。父歿事繼母撫稚弟誠篤備至。里黨中言孝友必稱道昱。昆弟同居數十年。昱歿後弟乃析產多自予。兼數倍。人見昱之子時時不給。愈多。昱之賢同縣人劉有德與弟有才家貧以傭工供旦夕。兄弟俱天性過人。母瞽盡孝養。鄉人稱之。知縣呂履恒聞其貧而能孝。時給以錢粟。

朱元址字定中汾陽縣人。以歲貢生官和順縣訓導。元

址性孝友少失父事繼母曲盡子職生平雖無所見於世子弟後學咸以其內行修也奉之爲師法良有司至是者亦樂表其善行以爲多士勸子鈺王子舉於鄉亦以孝稱

郝之芳字炳青汾陽縣人歷官壺關縣訓導知山東之肥城縣江西之瑞昌縣遷太常寺博士改中書科中書陞見日以同知用發往江南權知江陰縣事數月因病告歸其居官有廉操多惠政自少失父事繼母以孝聞與弟之荃之芬友愛極篤兩弟亦念兄居官清正常輦家貲所有至衙署以佐祿入不及蒞肥城時值歲饑奉

文賑貸不少假手胥吏務於民實有濟及至瑞昌捐俸  
創設義學又於忠孝節義祠旁建講堂課勵其秀民得  
以造就者多人共呼爲郝公講堂

曹曰英字彥傑汾陽人少孤事母孝爲諸生有聲譽家  
素饒能推恩族黨賴以舉火者衆有張媪者於母爲中  
表姊妹廢老無所依養之終其身居鄉務退讓子學曾  
偶與老農語言不相下親詣昨舍謝失教不問曲直也  
縣境舊食附近土鹽雖行河東之引而不食其鹽惟輸  
稅於官謂之鹽稅旣而設商價昂不便民且巡役肆行  
窮簷愁怨或至誣指平民私販其害不可究詰曰英與

衆詣官白狀卒得請均其稅於糧而廢商民以不擾蓋  
居恆悛悛而遇所當爲未嘗懦懦有如此曰英與同縣  
王敏友善敏極狷潔衆共呼之曰王廉士惟曰英餽粟  
遺布敏無所違却人或效曰英之爲輒復不見納曰英  
生平重然諾與人交有始終卒年五十有一乾隆辛巳  
以第三子學閔官檢討 覃恩勅贈如其官階

胡侃字介峰汾陽縣諸生遠近咸呼爲胡孝子父宗堯  
官馬邑縣教諭憂歸旣而病累年侃侍養盡孝道鄉人  
咸爲之感動故以孝子之名歸焉侃聞愈益自責父歿  
後適 朝廷有保舉例知其行者欲起之侃以母老辭

卒不就。

任錫嘏石樓縣諸生事母孝母癱病十餘年侍養不離側乾隆元年學使聞而表之。

冀晏平遙縣人性孝誠祖母癱病卧不能動移者踰三年晏晝夜侍養飲食必親進生母侯氏得蠱證醫家言蠱之屬名血蠱者以口吸去膿血得愈晏卽親吸之而母病果除縣中以孝行聞者鄧良輔鄧石長郭文煥任憲章趙榮秀郝振都喬壯觀冀良壁冀州燧喬法舜皆能誠篤不失子職。

段珂字佩斯汾陽人乾隆己未進士知浦城縣值歲饑

力請得賑恤又多方爲全活饑民計民賴以生尋丁母憂歸泣送者不絕於途

李錫嘏字如九臨縣人乾隆乙丑進士歷知陽武祀二縣始至陽武值水災親視民間疾苦請帑給賑其年冬復捐俸及勸富民輸粟煮賑民賴以不至失所祀歲饑錫嘏盡心安集奉文賑恤亦如陽武以堪勝知府保舉尋權知衛輝旣而同知開封督漕卒於途次其居官勤民事多惠政祀人立生祠於西郊外

何其慧永寧州拔貢生性孝友事母曲盡子道以朝考第一知鹽山縣

王玉書永寧州人有孝行乾隆十五年父病醫藥不效將危玉書請於父問思食何物父曰惟思桑木耳正值隆冬此物萬無生理玉書泣禱於神卧桑樹下竟寐久之及覺仰見樹則木耳新生色甚鮮取以進父病頓愈鄉人奇其事知州李廷秘聞之額表其門曰孝績臨沂張廷藩介休縣人有孝行居喪廬墓三年後官朔平府訓導乾隆二十三年以孝子旌祀鄉賢而右玉縣訓導郭恒鏡生員石汝璋田馨美生員梁浩弓斯張孟培烈董居中生員張國璞皆以孝行稱監生宋如隱齊東縣知縣梁洲定州同知張正任亦以廬墓稱孝



張呈繡介休縣監生七歲失父事母孝母嘗病思乳泉在山險中往汲遇虎虎殫視之徐去人以爲孝誠所感及母喪廬墓三年乾隆三十四年知縣王諱文爲請旌

汾州府志卷之十七

義行

賈淑字子厚林宗鄉人也世有冠冕淑爲舅宋瑗報讐於縣中爲吏所捕繫獄當死林宗與語淑懇惻流涕林宗詣縣令應操陳其報怨蹈義之士被赦縣不宥之郡上言乃得原林宗遭母憂淑來脩弔旣而鉅鹿孫威直亦至威直以林宗賢而受惡人弔心怪之不進而去林宗退而謝之曰賈子厚誠凶德然洗心向善仲尼不逆互鄉故吾許其進也淑聞之改過自勵終成善士鄉里有憂患者輒傾身營救爲州閭所稱

漢時

李洵仁汾州平遙人金新泰令皇統間元兵陷平遙時  
援兵五千編戶數百胥被殺骸骨暴野洵仁以宦遊得  
免及歸與平遙令梁琮募人拾遺骸萬餘於城西北爲  
巨塚葬之

韓子忠石樓人性孝友其弟名子同嘗以罪當棄市子  
忠以其子幼徃代之死主帥察知其情嘉之遂免子同  
罪禮送子忠還

以上元

董謙介休縣人洪武中官醫學訓科好義有勇略時縣  
境山水數發謙督夫築堤蠲金錢勞之浹旬而成永樂  
八年值寇盜肆掠謙率四子瑛偕秦冲及鄉之勇力者

三百人徑擣其巢賊驚潰復乘夜奄至謙橫刀搏戰至旦偕左右翼之時以二十人殺賊甚衆賊遂遠竄不敢窺介休。

曹祿汾陽縣人篤於孝凡修橋築堰鑿井務爲義行祈父年壽萬歷中餓莩遍野買地九畝以爲義塚。

劉得仁汾陽縣人歲旱願爲衆祈命禱雨遂自焚死大雨隨注州司馬葬之舊有碑題云義士劉得仁墓。

嚴敏汾陽縣人性好施凡衣食棺木藥餌濟人終身不倦而寧鄉縣高世科孝友端方里黨推重深於醫置藥活人甚衆隆慶六年知縣吳三聘上其事奉詔給冠帶。

張應堯字心聖介休縣歲貢生事祖父以孝聞兄弟七人同居立家規十六則復立同居另爨法祭祀婚嫁宴會餽遺及農工皆有度數家人千指咸謹肅人目爲義門。

高城寧鄉縣人嘉靖六年輸地四十有四畝移建縣學知縣張軾以義民額表之。

許汝元石樓縣人父歿逋負至數百金汝元曰逋不能償何以安亡靈於地下亦不能視諸弟饑寒無以自存乃更爲券自任以父業盡分三弟後判寧州所得俸盡償前逋訓諸弟胥成立有司額其門曰孝友之門。

晉賢石樓縣人六世同居孝友姻睦事聞詔旌之曰義門

鄒義字懷宜平遙縣人嘗三次助賑輸穀三千石詔旌之爲義官縣有神池泉水灌溉所資義開濬之又開渠以興水利子雲廣亦以輸賑旌義官

宋朝用介休縣人拾金五百訴於縣訪還嘗有客寄貨其家價踰千金流寇亂後踪跡無存訪知客僕盡以付之時人高其義而寧鄉縣王子深亦以拾還遺金稱義溫嶽董時習竝介休縣人周貧好施以義稱嶽尤工寫竹嫻弓矢流寇圍城嶽發三彈三中賊遂解去

楊時芳石州人嘉靖二十年九月有邊警時芳輸粟五百石火藥千斤造虎尾炮五百自齎至州城中途遇寇劫去遂被殺知州王朗以其忠義死寇爲請得旌

王志可汾州人正統二年以納穀千石助賑旌爲義民正統六年平遙縣李冲郭厚楊贊劉維各輸賑二千石石州張雷魏廣各輸賑千石寧鄉縣王玘白海劉儀郭贊各輸賑五百石正德六年介休縣梁晟董澄各輸賑八百石萬歷十四年平遙縣雷應正輸賑千石而臨縣白惟能亦以饑歲輸賑千石汾陽縣張得滿賈彬張國樞皆遇饑輸粟稱義得例旌冠帶

以上明

孟之俊介休縣廩生順治六年大兵討姜瓖餘黨軍於辛武堡前其弟誤放炮火搜罪至死時之俊感重病力疾起曰吾久爲棄人弟在猶可承業理家請身代之邀寬法薄笞舉歸飲食如舊病亦旋愈

董爾型介休縣人家素饒以捐修文廟順治十四年授訓導職子正紳亦準作恩貢正紳讀書務踐行著有性理集要等書遇歲饑則率先輸賑鄉人多德之康熙二十八年請祀入鄉賢

王元儒孝義縣人康熙三十六年饑元儒出穀三百石銀三百餘兩散給其村人五十九年六十年又大饑元



儒計村中有成丁一二人者給銀三兩買推挽車一具  
三四人者給銀六兩買推挽車二具每一車又給銀十  
二兩令往崞縣市米歸售所獲餘粟人自爲生老弱不  
能推挽計口給粟費千餘金而活人亦千計子定位能  
繼父風乾隆二十四年饑村人王奈以無食鬻妻既成  
待遣矣夫妻相視哭甚哀定位適見之如其所鬻銀數  
給還奈夫妻得保全後生有數子

呂謙字謹躬汾陽縣人好施樂排解有貧嫗張氏年六  
十無依周給衣食者二十年及歿買棺葬之里有貧欲  
鬻妻者謙聞之急饋以錢粟併勸其族人共資助得保

全生子成家。有張習之者。負債致忿爭。債主不能平。將構訟。謙既代償。而謂習之曰。彼免爾債矣。膝斲兒者。貧家孤兒也。遇諸路。惻然哀之。遂收養於家。生平所爲類如此。謙自少失父。天性過人。拜掃墓所。輒伏哭不能起。值明季寇亂。負父遺像以出。忽求不可得。入賊營。竟得之事。母曲盡孝道。母九十而歿。謙已七十矣。哀毀如孺子狀。歠粥三年。不以衰故。禮稍減損。卒年八十有三。以子文櫻誥封奉政大夫。

趙日昌字滋大。汾陽縣人。康熙乙卯舉人。性儉好施。與親族故舊待舉火者數十家。庚子辛丑連歲饑。日昌捐

銀三千助賑。

宋乾汾陽縣諸生寄居孝義縣居鄉樂施與好爲人釋爭解紛與兄賢讓倡作本村堡牆費甚鉅村人賴之知縣閔衍爲之記其子孫入籍孝義。

梁嶸字季宣介休縣人有昆陵蔣姓者以醫來介休與之善居數年病且死棺殮之籍遺金裝柩藏諸棺旣而  
其家無奔喪者護其喪跋涉三千餘里送還昆陵出所籍遺金歸其妻子昆陵人多嶸之義作詩歌美之而王  
國璽嘗於逆旅得遺金急追還之有平陽趙姓者寄銀  
口兩其人客死家無知者數十年後攜至平陽訪還其

孫國璽客閩積數千金父母已歿諸叔父分居久皆貧乏國璽迎之同居共飲食鄉人稱其賢監生馬淑琰撫兄弟遺孤三世共爨監生常道通六世同居皆門庭謹肅可風永寧州崔子文以還遺金知州許炳元爲申請給八品頂帶旌之

張瑛字玉采汾陽縣人家素饒每於歲杪出粟若干周鄉鄰之貧者以爲常康熙三十六年饑瑛旣出財粟助賑而賑所不及者持田契求售踵接於門皆自貶損價值瑛第如其願售之價視平時蓋不及十之於於是得田且千畝明年大熟瑛徧榜各村曰願贖者聽而旬盡

贖去人咸謂瑛長者其行事大致類此瑛所居曰西官村先是順治六年姜瓖之亂東官村趙姓者聚乘亂劫其家男婦俱被殺一稚子奔至瑛所瑛納之衆來索瑛曰是不可得必似得者吾兩村且鬪視強弱及亂平瑛助趙氏稚子白誦官治罪者十餘人當盜賊之遽起也瑛之村人將逃避賊瑛曰賊至未可知而先離散能保卽獲全乎孰若爲守計衆以村故無堡寨難之瑛曰堡寨誠不可猝爲塚村而溝焉其可遂相率爲溝廣一丈有奇深倍於廣東西設弔橋各一瑛又以其家樓堡封貯村人財物其既而賊大至踰溝村之人退入樓

瑛見一賊方據椅坐，左右指麾，急趨有力者，舉石礮投擊中之，身首俱碎，立斃。乃其渠魁也。餘賊怒，攻之急，樓上瓦石亂下，不得近，乃取薪積於門，欲火其樓。宅舊有井，僅供汲用。至是，泉忽大涌，男婦遞傳水於樓，以撲火。賊計不得施，又失其魁，數日稍稍去。瑛曰：可以出而逐之矣。相與持械出，大呼擊鬪，賊奔潰。方是時，瑛年纔十有九，遠近村被賊殘破不一處，而瑛之村獨完聚如平常。人服其智勇。瑛九十有一歲，視聽不衰，不脫齒，行不杖。一日無疾卒。季子乃擢，字簡臣，亦以行義重於鄉。不  
失父風。

王家棟寧鄉縣人順治三年以縣境地荒丁殘重爲民累遂破產棄家往來呼籲實情得達豁免荒閑地糧四千五百一十七石有奇絕丁差銀二千三百三十四兩有奇衆義之勒石志其事

賀美章臨縣諸生孝友敦厚生平未見違色疾言後學多宗仰之

馮芳猷字榮素汾陽縣人性孝友仁於族黨所居村堡牆卽八門城故蹟也堡西門傾圮悉傷人捐貲修繕完好出見路有餓而死者詢之野人知爲無主之屍急買布及棺斂瘞表其狀貌衣色以待或來訪尋嘗積里中

人借券踰千金盡焚之芳猷兄芳譽歿而無子時芳猷有一子際茂生二齡卽以爲兄後際茂長中康熙丁酉武舉官湖廣永定衛守備

崔景輝臨縣歲貢生性孝友不事生產蓬蒿滿徑苔草盈堦教授生徒遠近學者宗之卒後門人撰德行碑表於路旁

王邦選字秀升汾陽人嘗設義學教其鄉之子弟貧不獲親師者乾隆己卯庚辰捐米麥八百五十石助賑太守嘉其好義額表之辭不居先是康熙中邦選尙少爲謀於鄉遂出已貲鑿渠引汾水文水資灌溉值賜款而



一鄉獨以有秋邦選偉儀表篤於孝友自幼卽習治家事曰有子而父任其勞何貴有子雍正九年新設勇健營選壯士邦選爲當事所物色欲薦舉以父母老不忍離左右卒辭不赴次子恒兆壬申科武舉官直隸插箭嶺守備

梁椿孝義縣人幼失父事母奉養備至弟三人旣長娶妻分祖所遺產各別居後椿勤於業更有增置復分以與三弟鄉里稱其友愛無異辭知縣閱行額獎之

曹建經介休縣人濬沙河築隄堰數十村免於水患生員喬甲第亦捐銀修所居村水隄而守禦郭拔捐銀三

百兩修洪山村及源神廟大路

劉世昌介休縣人候選員外康熙四年兩次助賑輸粟三千餘石銀二十餘兩所居坐遭水患出銀六百鑿渠分其流俾水不爲害貢生周企儒康熙年間歲饑輸穀七十石郭天立輸銀五百七十餘兩生員張文湛輸穀百石銀二百兩貢生李之貞輸穀百石銀百兩溫沖玉輸銀二百兩曹國祥張恭讓各輸穀八十石承德郎喬士多輸銀三百兩貢生董協徵康熙五十九年採買米麥減價平糶仍以所糶銀五百兩散給得議叙教職選用雍正十一年監生范毓馨輸助賑銀二千兩監生溫

額以本村戶長多累置義田數十畝以爲應充者工食  
乾隆二十四年輸助賑銀四百兩韓維翰亦捐銀五十  
兩生息給本村戶長李正明以坊地低陷一兩卽成巨  
浸捐資買地五畝鑿爲深池以貯水乾隆二十四年輸  
助賑銀百兩田玉侯捐地開渠以利一村乾隆二十四  
年輸賑米百餘石指揮使郭鎮璋乾隆十三年輸餉銀  
八千兩議叙二十四年與從弟鎮琳鎮璜共輸銀四千  
兩米六百石李寶乾輸銀八百兩劉昌基輸銀七百兩  
府通判喬凌霄輸銀三百兩貢生張崇楫輸銀百六十  
兩其餘捐賑有差而薛有煥於二十四年輸銀并所募

共二千六百餘兩。

程恂字實菴平遙縣人康熙五十九年乾隆十四年出粟賑饑平時皆多所施濟。

李日耀汾陽縣人願以千金修堡事未行因歲饑遂以散粥村人其子忠森孝森節森復以二千六百卒修堡成父志康熙六十年捐賑六百兩左都御史朱軾題請給額優獎又郎中田周捐賑六千兩肇慶府知府韓謨捐賑六百兩候選知縣下懷仁家共捐三千兩其餘捐賑有差。

范三拔介休縣人康熙六十年捐賑五千兩又助修文

廟生平多義行。祀鄉賢。子毓韻。以雍正四年西征。任轉運功。叙太僕卿。服用二品。先是康熙三十九年。官辦銅鉛。共事凡六人。有王某者。虧帑八十三萬。既死。毓韻謂四人者曰。諸君與王某。日事奢靡。今所虧帑金。獨委之重負。死友何益。惟我問而已。乃按期如額。爲賠補。子清。洪乾隆戊午舉人。歷官至浙江寧紹台道。清注。丙辰副貢。內閣中書。戶部廣東司郎中。以督運金川。助餉銀二十萬。加太僕寺少卿。清澳。亦戊午舉人。清沂。戊辰進士。翰林院編修。毓韻弟毓譚。因兄辦銅運餉。兩事控德。招之入都。俾運察漢叟兒米萬石。歷驚沙積雪之地。無悞。

軍需節省帑銀八十萬兩叙功授布政司叅政及銓期  
父病急歸侍湯藥父歿哀毀致疾卒毓麟康熙丁酉武  
舉歷仕至河北廣東正定各鎮總兵官都督簽事在河  
北時出已貲買馬千餘匹發營補額

梁開國孝義縣諸生康熙六十年饑其村舊有數十人  
推挽車爲業者開國各給銀若干令赴代州市米于是  
無車者亦假車告助開國槩給之家人以病牛取價開  
國知之急持銀贖還

田丕黼孝義縣人康熙六十年饑村人待以舉火者數  
百家知縣張瑋爲給旌獎子繼學貢生行善益力首捐

義倉創立禁約鄉人遵之數十年無賭博爲非者族人  
以病將鬻妻繼學聞之贍其口用不使分離嘗買僕一  
日知其爲人獨子急焚券促令速還縣西接寧鄉山徑  
崎嶇繼學捐金墾高堙下十數里成坦途寧鄉士民立  
石紀之乾隆二十三年後連經荒歉不備之孫裕樞裕  
穀裕賦設法賑濟計口授食歷三載村人不覺爲歉歲  
劉洪澤介休縣人員外職銜康熙六十一年西醜未靖  
輸米三百三十三石運赴軍營助餉議叙卽用聞父病  
急歸則父已歿遂終身事母不復仕鄉人有鬻妻者聞  
之卽代償其值令得完聚雍正十三年饑輸銀五百兩

助賑乾隆十年李文輝輸銀四千兩軍功議叙乾隆十三年州同知劉洪教助餉銀四千兩州同知賓穆助餉銀千兩縣丞高擢助餉銀三千兩生員宋懷棠助餉銀千兩恩貢生羅贊助餉銀千兩監生劉洪莊助餉銀萬五千兩指揮使郭鎮璋助餉銀八千兩武進士張新正助餉銀二千兩千總職銜張王政助餉銀三千兩楊茂星助餉銀千兩三十一年張王政又以修城輸銀千兩張大筠以修城輸銀七百兩各議叙有差

董協寧介休縣人值歲饑捐米百五十石以給餓者縣苦鹽商坐販之弊爲陳於知縣肅蕙革商辦引民咸賴



之

龐完貞寧鄉縣人性孝友爲里黨推重有失行者輒曰愧完貞知之也視力所能周恤孤弱賴以成婚娶者四十餘家而蘇霧及弟成皆以好施爲鄉人所稱迨

馬生彪孝義縣人克敦友愛先時兄弟四人分祖產生彪擇其薄者父後又生一子生彪以已產分給幼弟其于馬奇功亦能讓財

李煥字其章汾陽縣人捐職州同知寄居孝義縣性慷慨見人困厄汲汲如已事尤篤兄弟厚鄉鄰雍正十二年兄燧貿易河南誤被獄牽連罪應遠戍煥聞倉皇變

已產赴京得贖兄罪及歸兄有四男一女無產業煥爲之撫養嫁娶煥有一子纔數歲置家塾延師訓課親友子姪之來學者煥悉爲具束修並給塾中子弟一切膏火之費於城西置義塚地六畝常蓄棺具布匹有不能葬給棺一具布一匹歷任府縣皆有旌獎又循例舉報孝廉子天賜孝義縣籍監生循父所行不衰

康王召臨縣人因甲戶凋瘵出私積六十餘金買水田十畝永爲戶徭公費雖一節好義亦屬可錄

王希旦孝義縣諸生孝友好施與鄉里多德之

梁瑾孝義縣諸生行素廉潔一日於路見遺金拾而急

訪還其人雍正七年事聞詔賜貢生加訓導職銜旌之  
李亨翠平遙縣監生好施與於里中設義學鄰近寡婦  
雷氏貧老無依月給之粟至歿棺斂之王某妻產一女  
而妻死欲棄其女亨翠聞僱乳母養之長有高苜者欠  
亨翠租穀四十餘石及白金三十欲賣女爲人妾以償  
亨翠知其事取券與之女得不賣子天林歲施藥濟人  
而縣中安拱極閭治亦以有義行稱

張世淳孝義縣人家貧少失父母自力成家性樸厚於  
從父昆弟諸子推所有分給俾一無失所生平然諾不  
苟爲鄉里推服

張國珍字朝修介休縣人性孝友歲饑出粟賑濟者數次嘗爲輸錢糧積逋所居村修堡牆西面百餘丈所論著有易書評解四柏齋文集以歲貢官太原府訓導卒於官

王敏字慧庵汾陽縣武生也廉潔自持值歲饑斷餐二日得一飯弟手白金至曰少易粟敏正色語弟奈何干人敗家風令持去嘗有督理事司出入事竣衆指餘金曰準材計費不宜餘始君之物雜入其內耳敏曰諸君謂我貧意以餘金畀我公事不可實私橐友以其困欲有贈袖白金至坐語竟日而返難出諸袖中也遠近咸

呼王廉士然敏生平勇於爲人性慤直衆以公事宜謁  
有司二日不得達敏至徑入陳衆方疑畏而敏辭氣慨  
然有司無以屈之卒如其請同學李某負屈繫獄敏與  
衆進於庭爲辯理罄囊恤其囹圄中事白乃已一友人  
觸官長在縲紲親戚畏避而敏往來省視官長訪知其  
名不加怒也敏老而無子一婢自幼畜之長有姿容或  
勸納以爲妾敏曰吾貧困何又重累少年尋有不惜三  
百金來購此婢者或以勸答曰貧吾分也恥因婢取財  
況不得其所彼之生死事大吾雖終窮弗忍爲於是卽  
爲擇配嫁之前時敏嘗徒步赴省試旅舍中遇一稚子

察知爲被誘者。走百里送歸其家。則寡婦撫此兒。忽失之。正遑急。不欲生。望見兒。母子如獲更生。願酬謝。敏曰。吾憐稚子無依耳。何謝爲。遂行。敏捐潔多。近義。是以人嘖嘖喜稱道。年七十有一卒。送葬者塞於途。

任元直。汾陽縣人。有孝行。與人交。篤於友誼。一友死。周恤其妻終身。一友無子。出貲財爲買妾。舅氏歿。孤幼。元直經紀其家數十年。舅氏本富族也。而元直持介行。尤嚴。令出入楚楚。其居鄉。剛正不阿。又內行修。鄉人咸敬之。

梁治國。孝義縣諸生。性樸誠。好施與。每歲十有一月。輒

汾州府志 卷十七  
出粟以濟其鄰里親友困乏必賙而自奉極儉約同居  
四世無嘖言

蔡廣生字大敦汾陽人雍正中歲貢忻州訓導性質樸  
不事修飾言行無所苟居家以孝友爲先鄉里宗之知  
府劉登庸立旌善牌書其事及爲司訓教育有方士林  
稱美

呂經字正五丁卯舉人汾陽人秉性剛直嚴毅不苟生  
客稍失禮輒棄去家貧無以自給親友貽以粟却不受  
其介如此設仰高社會文門下皆一時名士文章爾雅  
至今傳其師法

姜之棟字廷礎貢生汾陽人自幼敏達因奉寡母遂絕意功名弟之棟早夭撫遺孤如己子教之成立處鄉曲有疑難事一言立決無不允服

孔玫字晉璠汾陽人少英敏積學力行雍正癸卯領鄉薦以裁成後進爲己任經其指授循循有法度里人高其行誼近遠稱曰晉璠先生壽八十三

呂文樞字象樞汾陽人貢生言信行果不事虛華居父喪哀毀骨立性好施予親黨貧乏者多蒙其惠壬午歲北城圯倡捐銀八百兩由是邑紳公捐以備甃石之用功不日告竣年七十餘舉元孫五世同堂人以爲厚德



之報云。

劉晉字麗明汾陽人廩貢閉戶讀書尤嗜春秋聚徒講學五十餘年壽九十三歲後失明講春秋者猶日至其門士林宗之。

梁祖益平遙人貢生事母孝母病癱晝夜不離側久而弗替村被水出積粟二百石全活多人鄉里頌其德。

辛應甲永寧州人雍正十三年官永明桃川市巡檢所分轄猺民四曰古調曰勾藍曰清溪曰扶靈其俗無禮法悍戾蠢愚應甲至每猺爲之各延一師詩書之教始通稍稍補博士弟子於是咸欣然向教及應甲卒於官

徭民德而神之立祠歲祀焉應甲性孝友父母早歿撫  
愛諸幼弟見稱里黨雖貧竭已貨急人之急有不能棺  
殮者其子哭於道亟歸視無所有謀諸婦出糶奩以與  
之官廵檢時始儼民居詢官署遺址則明季燬於兵且  
百年矣累俸餘卒成廡舍知縣徐念祖有記

郭建瑄字廷獻汾陽縣人弟建琦字希珍皆循循持禮  
法以孝友稱父有疾卧牀第者三年兄弟躬侍不離側  
俗尚浮屠治喪以作佛事爲孝瑄兄弟惟一衷於禮鄉  
人徃徃化之母病目難投藥腫痛不少減而瑄於前外  
出琦憂禱宿壇次夢有告者曰舌舐可愈如是而目果

愈時瑄亦以夢治裝歸計其夕卽弟夢告者之夕也瑄  
念府城考院自前明以來久不修且制未闕廡學使按  
臨諸生若童子露立階下風雨之辰尤草草士無威儀  
濕漏或不能置筆硯其間遂以乾隆七年請於官願一  
家獨任其費遂大新之八年設社倉又輸穀千二百石  
十三年金川蠢動縣之薦紳家有助餉議瑄琦則輸銀  
萬兩瑄以原職銜議敘卽用知州琦得光祿寺署正而  
趙億助餉銀萬兩卞懷鐸助餉銀六千兩趙偃郭繼儀  
助餉銀各五千兩賈鏡助餉銀四千兩張所抱助餉銀  
三千五百兩卞懷繡卞懷錦姜模姜柏王愷田高助餉

銀各三千兩趙愿趙憲助餉銀各二千二百五十兩惠大成助餉銀二千兩張書蒲助餉銀千二百五十兩張書堂趙應趙懋趙恩趙維治李瑋助餉銀各千兩張書思張書楠助餉銀各五百兩二十四年郭建琦輸賑米六十石銀六百兩張所抱輸賑米六十石銀二百兩賈誠輸賑米四十石銀四百兩王愷輸賑米七十石賈生瑤輸賑米五十石郭繼偉繼仲繼佺共輸賑米六十石銀二百兩李惠劉宗邦侯恭各輸賑米三十石夏璋張書紳馮駟各輸賑米二十石賈應輸賑米十二石王瑄李敬李發智各輸賑米十石三十年以修城卞懷調卞

爾坦李開江各輸銀千兩呂審燾輸銀八百兩郭繼傳  
輸銀六百兩張素莊張素藩董志舒夏璋各輸銀五百  
兩趙嘉泰武汝翼郭繼僊張忱宋廣亨各輸銀四百兩  
賈白玉郭鎮張錫肇張錫綸趙維淮馬周望張鵬飛各  
輸銀三百兩張企仲輸銀二百五十兩侯柯張萬選任  
元第蔚凌雲各輸銀二百兩張廷模宋永華李尙文各  
輸銀百五十兩王承佑張書思田之芬封藩張瑗各輸  
銀百兩

郭大璣字肯堂平遙縣諸生自其祖以來孝友嫻睦治  
家有法同居六世五十餘人無不謹守家風者學使聞

之嘗額獎其門子興讓字履實乾隆甲戌進士知安平縣有循聲以父憂歸卒於家

任灝永寧州人行高而至率易知州謝汝霖聞其賢願一見不可得精究於醫察脈以知死生如神投劑多異尋常皆有奇效或饋之金却不受也富貴人欲求其診治不能致必因於貧士輾轉以達鄉人多道其高節

薛五絨字子素臨縣諸生也少爲武生課蒙於汾陽隔牆聞有人問先生佳否應者曰武生耳卽辭去棄而就文及省試見鄉闈搜檢者曰人不自知恥致防如賊待如句吾羞人矣竟絕意仕進其狷如此既而讀書一士

穴中三十年尤好易歿發其篋多宋儒書

孟養正字聖功介休縣人課里中童子先與講明朱子小學之書今方容矩步鄉至以古人嘲之從其學者目爲學蠱以故皆散去貧不能自存販書行鬻非聖賢及先儒之書不驚愈益困舍而業醫人服其待人必以忠實也於是術頗售養正好宋儒書分別流派孰純孰駁言之頗有據依然拙滯不善屬文其爲人剖明正學俗學之辨有感動於言下者究莫之能從養正生平狷而慕學亦鄉之善士

郭意誠字太箴汾陽縣人少以學守自勵乾隆庚午舉

於鄉遇孟養正聞其語悅之盡棄所學從事小學之書  
雖盛暑必衣冠終日鄉至呼爲郭聖人方被薦後不謁  
主考暨房考官曰拜爵公朝謝恩私室當自出門一步  
謹之會挑選唱履歷衆皆跪意誠獨長揖或議其立異  
曰未受爵不拜非敢立異其行事彷彿養正雖處內室  
必自飭家人咸憚其嚴連丁父母憂一秉喪禮行之所  
著書有齊民日用錄大意爲村學小子設而委曲譬喻  
導以入學爲人之道年五十卒

程學孔字紹洙汾陽人戊辰進士性至孝績學能文於  
盛暑衣冠危坐扃戶讀書弗輟也父商於蘇年餘無音



耗一夕夢父病及寤涕泣不勝因趨裝往省父果病竭  
力醫治又禱於神祈以身代卒不起扶柩歸以哀毀成  
疾卒於道

魏國正字衡如號書巢汾陽人少穎悟過目成誦性孝  
友冲齡失怙依寡母以居先意承志事事得其歡心奉  
胞兄卿若嚴師每出入稟而後行弱冠補弟子員文章  
博雅名重士林二十歲領鄉薦主司擊節賞歎以呈薦  
稍後列第五三十捷南宮下關讀書惟吟咏自娛神似  
玉溪生會徵詔至以瘵卒里人惜之所著有書巢遺集  
行世

王彥孔永寧州歲貢生銓陽高縣訓導有學行其居鄉也州有離石水山水暴漲田稼被衝在在受水之害而鮮獲其利惟穆村南山鑿石岸不患衝激水利可興彥孔度地勢濬其渠引水灌田八百餘畝村人爲建祠勒石志之

宋璨宋琅平遙縣人兄弟友愛好施與乾隆三十二年汾水暴漲漂沒廬舍璨琅多作木筏急令人拯救至其家得出於溺者數百人男女各置一所分給養之待水患平乃散還知縣德貴額獎之

曹曰英字彥傑太平村人曾祖朝仕有隱德明季嘗遇

異人授以術可致富終不一試或請以千金購其方歎曰若用吾術何止千金哉吾惟不義之故不試亦不欲以告人也臨終謂其子曰吾得異人術非不知可利子孫然遺之以利何如遺之以正乎曰英未冠而孤力學爲邑諸生有聲庠序事母孝與妻王左右奉養無間言母有中表姊妹娶老無依曰英迎於家養之終其身居鄉里務爲退讓好施與有負之者亦未嘗與校一日其子與鄰人詬曰英聞卽扶之曰此吾鄰里卽汝諸父行孺子敢無禮耶親詣鄰人謝失教不問其曲直也邑有孝子王惠庵者貧不受人一錢獨與曰英善歲時餽之

則受曰此彥傑所貽非盜泉也雍正中郡人苦鹽商之橫曰英倡士民言於當事請均鹽稅於糧而逐商事得行至今便之卒年五十有一以子學閔貴贈儒林郎翰林院檢討